

Wednesday, February 4, 2026

Time - 2:30pm - 2:35pm

AKASHVANI AIZAWL

REGIONAL NEWS UNIT

REGIONAL NEWS BULLETIN

(MIDDAY)

LIQUOR SEIZURE

Mizoram sorkar chhinchhiah danin, nikum December 2025 chhung khan zu zuar mi 608 bakah rakzu litre 4,964 chuang man a ni.

Mizoram sorkarin a chhinchhiah danin, nikum December thla khan Excise and Narcotics Department chuan zu zuar mi 593 an man a, Mizoram Police pawhin zu zuar hi mi 15 man bawkin, zurui Excise lamin mi pakhat an man bakah, Police-in mi 6 an man bawk. Nikum 2025 December thla a Excise and Narcotics Department ten zu bilh lai an man zat chu tin 3,336 a tling a, Sapzu, Indian Made Foreign Liquor IMFL chu Excise and Narcotics Department hian ml 750 bottle 2,020 an man a, Police lam pawhin bottle 1,848 an man bawk, Excise leh Police-in a um puitling (IMFL ml 750) an man zat hi bottle 3,868-a tling a ni. Excise and Narcotics Department-te hian IMFL hi um chanve chi 1,701 bakah Mizoram Police-te chuan bottle 576 an man a, sapzu um chanve man hi a belhkhawmin um 2,277 a ni a, hei bakah hian Mizoram Excise and Narcotics Department chuan IMFL ml 180 bottle 2,144 bakah Beer ml 650 bottle 21 leh canned beer ml 500 can 8,780 an man bawk.

Excise and Narcotics Department chhinchhiah danin, thei atanga siam, fruit wine chu nikum December thla chhung khan litre 3 chuang man a ni a, BEDC pawh Excise lam hian litre 143 an man bakah, Police lamin litre 372 an man a, Excise leh Police in a BEDC an man belhkhawm hi litre 515 chuang a ni a. Ram dang atanga zu lakluh hi Excise lamin um 21 an man bakah ram dang atang thova canned beer lakluh can 264 man bawkin Excise and Narcotics department hian zu sakna bel 38 an man bawk.



AMBULANCE, OXYGEN

Adviser to CM (Technical) Pu H. Ginzalala chuan vawiin khan Hnahlan PHC-a hman tur Ambulance leh oxygen bur hnih Power Grid Corporation of India Limited ten CSR fund hmanga an pek chu a hlan.

MLA Er. H. Ginzalala chuan Hnahlan leh a chhehvel khua ten PGICL te kal tlanga Hnahlan PHC hman tur Ambulance leh Oxygen bur an dawng thei hi lawmawm a tih thu a sawi a. Hnahlan leh a chhehvel khua-ah mihring an lo pun zel avang leh Hnahlan khua hi ramri a awm a nih avang leh damlo tam tak tlan khawmna hmun a nih avangin hriselna kawnga hmasawmna ruhrel tih changtlun a tul thu a sawi a. Chet sual tawkte, Nu nau nei leh damdawiin lian zawk pan ngaite’n hmanhmawh thil thua District Hospital leh damdawiin lian zawk an in phurh thlen zung zung theih na’n tangkai taka an hman a duhsak thu a tarlang bawk.

He hunah hian Hnahlan PHC a thawk tute, PGICL aiawh te, khawtlang hruaitute leh khawtlang mite telin, Hnahlan PHC Medical officer Dr. Vanlalpeka PL Pachuau leh Power Grid aiawhte’n thu an sawi bawk.



JU-JITSU

Thla hlui January ni 31 atanga February ni 2 chhung khan Guwahati, Assam-ah 1st North-East Ju-Jitsu Championship buatsaih a ni a, Ju-Jitsu Association of Mizoram (JAM) tirh Mizoram aiawh a infiammi kalte chuan Gold medal 6 leh Bronze medal 3 an rawn hawn a ni.

Ju-Jitsu hnuaiah hian fighting style chi 3 - Ne-Waza (Brazilian Jiu-Jitsu), Contact Fighting (MMA Rules) leh Fighting System (Semi Contact striking leh Grappling) a awm a. Mizoram aiawha kal mi 5 leh coach 1-te hi JAM-in team entry fee, thlen man leh ei leh in man a tumsak vek a, SPES Martial arts Academy-in kal man a tumsak bawk.

Ju-Jitsu hi khawvela Martial arts thang chak berte zing ami niin kum naupang ber atanga upa ber thleng pawha zir theih, mahni invenna leh MMA atan pawha tangkai berte zing ami a ni a, ram thenkhatah phei chuan police leh school naupangten an zir ngei ngei a ngai hial a ni. Mizoramah pawh JAM hruaitute thahnemngaihna-in national leh regional tournament ah intirh ziah a ni a, Ju-jitsu hi

Ministry of Sports pawmpui infiamna a nih bakah Olympic Council of Asia (OCA) pawm niin Asian Games-ah hial medal game-ah telh a ni tawh a. India rama Brazilian Ju-Jitsu black belt nei mi 10 aia tlem zingah Mizoram mi pakhat a tel ve a ni.



GINGER

Mizoram Agricultural Marketing Board (MAMB) hotute chuan kumina sawhthing hralh chhuah chungchangah sawhthing lei tura tender rate an bituk kg-a cheng 40 atanga cheng 45 inkar chu chhangtu an la awm lo tih an sawi.

MAMB hotute’n Akashvani News Aizawl an hrilh danin, sawhthing chingtuten a an sawhthing hralh tur an dahkhawmna Secondary Collection Center (SCC) chu kumin atangin awmze nei taka kalpui a nih thu an sawi . Nikum lama sawhthing chingtute’n an sawhthing chawh hmasak apiang SCC-a an dah khawm chuan sawhthing rihna a tih hniam bakah tawih chhia a siam tam theih thu sawiin hemi pumpelhna atan hian kumin lamah chuan sawhthing dah khawm pawh awmze nei zawk a an kalpui thu an sawi. SCC-a sawhthing dah luh chu a dahna ipah a neitu hming leh khaw hming bakah ration card number emaw aadhaar card number ziah tel thlap thin a nih thu an sawi bawk.

MAMB hotute chuan mi thenkhatin Manipur leh Burma atangin sawhthing chawh sa man tlawm te a lalutin, Mizoram a chin ang a hralh chhawn leh an tum tih an sawi a. Hetiang thil ti thinte hi an hming leh an khua an hriat vek tawh bakah Champhai Bawrhsap leh Home Department lam pawh hriattir an nih tawh thu an sawi bawk.

